

ფიზიკური პირების გენერალური ხელშეკრულება საბანკო მომსახურების გაწევის შესახებ (ზოგადი პირობები)

მუხლი 1. საგანი

- 1.1. გენერალური ხელშეკრულების საბანკო მომსახურების გაწევის შესახებ (შემდგომში „გენერალური ხელშეკრულება“), და დაკავშირებული გარიგებების საფუძველზე ბანკი კისრულობს ვალდებულებას გაუწიოს კლიენტს, მის მიერ წარდგენილი განცხადების საფუძველზე, რეალურ და დისტანციურ რეჟიმში ამავე გენერალური ხელშეკრულებითა და დაკავშირებული გარიგებებით გათვალისწინებული წესითა და პირობით საბანკო მომსახურება, რომელსაც წარმოადგენს:
 - 1.1.1. საბანკო ანგარიშის გახსნა და ანგარიშის მეშვეობით ოპერაციების წარმოება;
 - 1.1.2. დისტანციური საბანკო მომსახურება;
 - 1.1.3. სადეპოზიტო / საანაბრო მომსახურება;
 - 1.1.4. საკრედიტო მომსახურება;
 - 1.1.5. საგადახდო ინსტრუმენტებით მომსახურება;
- 1.2. გენერალური ხელშეკრულებით, და მათ შორის დაკავშირებული გარიგებებით, გათვალისწინებული საბანკო მომსახურების სანაცვლოდ კლიენტი კისრულობს ვალდებულებას გადაუხადოს ბანკს საზღაური (საკომისიო და სხვა) ბანკის მიერ დადგენილი ტარიფების შესაბამისად, რომელიც გამოქვეყნებულია ბანკის ვებ-გვერდზე <https://halykbank.ge/ka/individuals/rates>.
- 1.3. „დეპოზიტების დაზღვევის სისტემის შესახებ“ საქართველოს კანონის შესაბამისად, 2026 წლის პირველი აპრილიდან ყველა დეპოზიტორის დეპოზიტზე/ანგარიშზე არსებული თანხა, დეპოზიტების/ანგარიშების რაოდენობის მიუხედავად, თითოეულ კომერციულ ბანკში და მიკრობანკში დაზღვეულია და დეპოზიტების დაზღვევის სააგენტოს მიერ ანაზღაურდება 50 000 ლარის ფარგლებში. კომერციულ ბანკში და მიკრობანკში ყველა დეპოზიტორის ყველა ანგარიშზე არსებული თანხა ავტომატურად დაზღვეულია დამატებითი საზღაურის გარეშე. დამატებითი ინფორმაცია იხილეთ დეპოზიტების დაზღვევის სააგენტოს ვებ-გვერდზე: www.diagency.ge

ტერმინთა განმარტება

თუ ხელშეკრულებით ან/და მასთან დაკავშირებული სხვა ხელშეკრულებით სხვა რამ არ არის განსაზღვრული, ან მისი კონტექსტიდან სხვა რამ არ გამომდინარეობს, ხელშეკრულებაში ან/და მასთან დაკავშირებულ სხვა ხელშეკრულებაში ქვემოთ მოცემულ ტერმინებს აქვთ შემდეგი მნიშვნელობა:

- **საბანკო ანგარიში** (შემდგომში **ანგარიში**) – ბანკში პირის ფულადი სახსრების აღრიცხვის უნიკალური საშუალება.
- **პირი** – როგორც რეზიდენტი, ისე არარეზიდენტი ფიზიკური და იურიდიული პირი, აგრეთვე კანონმდებლობით გათვალისწინებული ორგანიზაციული წარმონაქმნი, რომელიც არ არის იურიდიული პირი (არარეგისტრირებული კავშირი, ამხანაგობა, ბინის მესაკუთრეთა ამხანაგობა).
- **კლიენტი** - პირი, რომელსაც გახსნილი აქვს ან სურს გახსნას ანგარიში ბანკში.
- **განაცხადი** - ბანკის მიერ განსაზღვრული ფორმით შექმნილი და კლიენტის მიერ მატერიალურად ან/და ელექტრონულად წარმოდგენილი ან/და დადასტურებული დოკუმენტი/ინფორმაცია რაც ადასტურებს კლიენტის ნებას შესაბამისი მომსახურების/პროდუქტის მისაღებად და ითვლება კლიენტის მიერ მატერიალურ დოკუმენტზე თანხმობის განცხადების / ნების გამოხატვის თანაბარი იურიდიული ძალის მქონედ.
- **ტარიფები** - საბანკო მომსახურებაზე საკომისიო სარგებლის ტარიფები, რომელიც განსაზღვრულია ბანკის უფლებამოსილი ორგანოს მიერ და მოქმედებს საბანკო ოპერაციის განხორციელების/მომსახურების მიღების თარიღისათვის.
- **ინტერნეტ ბანკის სისტემა** - ბანკის მომსახურების სისტემა, რომელიც კლიენტს საშუალებას აძლევს, დისტანციურად ინტერნეტის ქსელის მეშვეობით ელექტრონული დოკუმენტების კლიენტსა და ბანკს შორის გაცვლით, მართოს თავისი საბანკო ანგარიშები 24 საათის განმავლობაში ბანკის ინტერნეტ-გვერდის www.myhalyk.ge ან/და მობაილ ბანკის აპლიკაციის გამოყენებით.

- **დისტანციური მომსახურება** - გულისხმობს საბანკო მომსახურებას, რომელსაც ბანკი გაუწევს კლიენტს შემდეგი საბანკო პროდუქტების ფარგლებში: ა) ინტერნეტ/მობაილ ბანკი, ბ) სატელეფონო მომსახურება;
- **სატელეფონო მომსახურება** - გულისხმობს კლიენტის მიერ ბანკში გამოუცხადებლად, ბანკის კონტაქტ-ცენტრის მეშვეობით, ბანკში არსებული ინფორმაციის/მომსახურების მიღებას.
- **SMS კოდი** - შემთხვევითი წესით დაგენერირებული ციფრების კომბინაცია, რომელიც გამოიყენება დისტანციური საბანკო მომსახურების გაწევისას ოპერაციების შესასრულებლად. კოდი უნიკალურია და მოქმედია ერთჯერადი გამოყენებისთვის.
- **ვებ-გვერდი** - ინტერნეტ გვერდი, რომელსაც ფლობს ბანკი.
- **იდენტიფიკაცია** - პირის საიდენტიფიკაციო მონაცემების მოპოვება, რომლებიც ამ პირის მოკვლევისა და სხვა პირისგან გამორჩევის საშუალებას იძლევა;
- **ვერიფიკაცია** - პირის შესახებ ინფორმაციის (დოკუმენტის) მოპოვება, რომელიც ამავე პირის საიდენტიფიკაციო მონაცემების სიზუსტის გადამოწმების საშუალებას იძლევა (სახელმწიფო სერვისების განვითარების სააგენტოს მონაცემთა ელექტრონული ბაზის საშუალებით);
- **ელექტრონული მონაცემთა ბაზა** -სსიპ „სახელმწიფო სერვისების განვითარების სააგენტო“-ს მონაცემთა ბაზა, რომლის მეშვეობითაც ხდება პირის საიდენტიფიკაციო მონაცემების სიზუსტის გადამოწმება;
- **საგადახდო ინსტრუმენტი** - სს „ხალიკ ბანკი საქართველო“-ს მიერ ემიტირებული საგადახდო ბარათი, საგადახდო საშუალება, რომელიც დაკავშირებულია კლიენტის ანგარიშთან.

მუხლი 2. საბანკო მომსახურების მიღება

- 2.1. გენერალური ხელშეკრულებით გათვალისწინებული საბანკო მომსახურების (შემდგომში „საბანკო მომსახურება“) კლიენტის მიერ მიღება წარმოებს ბანკისათვის შესაბამისი განაცხადის (შემდგომში „განაცხადი“) წარდგენის საფუძველზე.
- 2.2. საბანკო მომსახურების მიღების თაობაზე კლიენტის განაცხადი ბანკს წარედგინება წერილობითი ფორმით, ხოლო ბანკის ელექტრონულ-პროგრამულ სისტემაში ინტერნეტ-ბანკის სისტემით მომსახურების მიღების მიზნით კლიენტის ავტორიზების შემთხვევაში კლიენტის განაცხადი საბანკო მომსახურების მიღებაზე ბანკს შეიძლება წარედგინოს ასევე ელექტრონული ფორმით, რაც განიხილება კლიენტის ნების გამოვლენად და რაც სამართლებრივი თვალსაზრისით სრულად უთანაბრდება წერილობით ფორმას.
- 2.3. კლიენტის განაცხადით მოთხოვილ საბანკო მომსახურების გაწევას ბანკი უზრუნველყოფს განაცხადის აქცეპტისა და მოთხოვილი საბანკო მომსახურებისათვის აუცილებელი ყველა წინაპირობის კლიენტის მიერ დაკმაყოფილების შემთხვევაში.
- 2.4. შემდგომში ყოველგვარი გაურკვევლობისა და ბუნდოვანების გამოსარიცხად ბანკი უფლებამოსილია, მის ვებ-გვერდზე (www.halykbank.ge) გამოქვეყნებით დამოუკიდებლად და საქართველოს კანონმდებლობით გათვალისწინებულ მოთხოვნებთან ერთად დამატებით დაადგინოს (მათ შორის შეცვალოს არსებული) საბანკო მომსახურების მიღების თაობაზე კლიენტის განაცხადის აქცეპტირების პირობები და მოთხოვნები, ამ განცხადების განხილვის ვადა და პროცედურა, განცხადების ფორმა და შინაარსი, განაცხადის წარმოდგენის წესი, განაცხადის განხილვის ფორმა, განაცხადის დაკმაყოფილების ტექნიკური აღწერილობა და სხვა პირობები, რომლის შესაბამისადაც ბანკი განიხილავს კლიენტის განცხადებას და იღებს გადაწყვეტილებას განაცხადის დაკმაყოფილებისა და/ან უარის თქმის შესახებ.
- 2.5. ბანკის მიერ კლიენტის განაცხადის აქცეპტირების (დაკმაყოფილების) შემთხვევაში კლიენტს გაეწევა მის მიერ განაცხადით მოთხოვილი საბანკო მომსახურება წინამდებარე გენერალური ხელშეკრულებით, მასთან დაკავშირებული გარიგებებითა და ბანკის მიერ გამოქვეყნებული ტარიფების შესაბამისად.
- 2.6. კლიენტი აცნობიერებს, რომ საბანკო მომსახურების მიღების თაობაზე განაცხადი წარმოადგენს უკანგამოუთხოვად სამართლებრივ ინსტრუმენტს, რომლის მეშვეობითაც ის ამყარებს ბანკთან სახელშეკრულებო ურთიერთობას გენერალური ხელშეკრულებით, მასთან დაკავშირებული გარიგებებითა და ბანკის მიერ გამოქვეყნებული ტარიფების პირობების შესაბამისად, ბანკის მიერ განაცხადის აქცეპტირების შემთხვევაში, და რის შედეგადაც კლიენტს წარმოეშევა შესაბამისი უფლებები და ვალდებულებები, მათ შორის ფინანსური ვალდებულება.
- 2.7. შემდგომში ყოველგვარი ბუნდოვანებისა და ორაზროვნების გამოსარიცხად, ბანკი უფლებამოსილია განსაზღვრული ვადითა და/ან ვადის დაწესების გარეშე განუსაზღვრელი პერიოდით, მიზეზების გაცხადებისა და დასაბუთების გარეშე შეაჩეროს კლიენტის

განაცხადების მიღება / განხილვა წინამდებარე გენერალური ხელშეკრულებით, დამატებითი გარიგებებითა და ბანკის მიერ გამოქვეყნებული ტარიფების შესაბამისად გათვალისწინებული რომელიმე საბანკო მომსახურების გაწევაზე.

- 2.8. კლიენტის განაცხადის წარმოდგენის, განხილვისა და მასთან დაკავშირებული პირობების კლიენტისათვის ხელმისაწვდომობას ბანკი უზრუნველყოფს მის ფილიალებსა და ვებ-გვერდზე (www.halykbank.ge) გამოქვეყნებით. ამასთან, ვებ-გვერდის ცვლილების შემთხვევაში, ამ და სხვა ინფორმაციის გამოქვეყნება იწარმოებს ახალ ვებ-გვერდზე, რომლის თაობაზე კლიენტს ეცნობება ბანკში დაფიქსირებული კომუნიკაციის ერთ-ერთი და/ან ყველა საშუალების გამოყენებით, ბანკის შეხედულებით.
- 2.9. ბანკი არ არის შეზღუდული კლიენტის განაცხადების მიღებამდე, აქცეპტამდე და აქცეპტის შემდგომ ნებისმიერ დროს შეცვალოს წინამდებარე გენერალური ხელშეკრულებით გათვალისწინებული საბანკო მომსახურებისა და მასთან დაკავშირებული ნებისმიერი პირობა/ წესი, მათ შორის მიიღოს გადაწყვეტილება მომსახურების მოდიფიცირებაზე, გაზრდაზე, შემცირებაზე, ამოღებასა და სხვა მომსახურების დამატებაზე.

თავი 2. საბანკო ანგარიშის გახსნა და საბანკო ანგარიშის მეშვეობით საგადახდო და არასაგადახდო ოპერაციების წარმოება

მუხლი 3. საბანკო ანგარიშის გახსნა

- 3.1. კლიენტის განაცხადის დაკმაყოფილების შემთხვევაში ბანკი უხსნის კლიენტს საბანკო ანგარიშს (შემდგომში ანგარიში), ახორციელებს ოპერაციებს კლიენტის ანგარიშზე და უწევს საბანკო მომსახურებას საქართველოს მოქმედი კანონმდებლობის, შიდა ნორმატიული დოკუმენტების (მათ შორის პლასტიკური ბარათებით/საგადახდო ინსტრუმენტებით მომსახურების შესახებ ბანკში დადგენილი წესების და პირობების და და სხვა შიდა დოკუმენტების), ბანკის ტარიფების, წინამდებარე გენერალური ხელშეკრულების შესაბამისად.
- 3.2. ანგარიშის გახსნისას კლიენტმა ბანკში უნდა წარადგინოს დოკუმენტები, რომელთა ჩამონათვალიც განსაზღვრულია საქართველოს უფლებამოსილი ორგანოებისა და ბანკის შიდა ნორმატიული სამართლებრივი აქტებით.
- 3.3. ანგარიშის გახსნის შესახებ ინფორმაცია კლიენტს მიეწოდება ბანკის მიერ დადგენილი ფორმით, მათ შორის ინტერნეტ-ბანკის სისტემის მეშვეობით, ამ უკანასკნელი მომსახურებით კლიენტის მიერ ბანკისაგან სარგებლობის შემთხვევაში.
- 3.4. შემდგომში გაურკვევლობის თავიდან არიდების მიზნით, ინტერნეტ-ბანკის სისტემის მომსახურებით სარგებლობის შემთხვევაში საბანკო ანგარიში კლიენტს შეიძლება გაეხსნას, ბანკისათვის ელექტრონულ ფორმაში განაცხადების წარდგენისა და ამ განაცხადების ბანკის მიერ ინტერნეტ- ბანკის სისტემით დაკმაყოფილების გზით, რა დროსაც ბანკსა და კლიენტს შორის სახელშეკრულებო ურთიერთობა ყალიბდება წინამდებარე გენერალური ხელშეკრულებით გათვალისწინებული შესაბამისი პირობების მიხედვით.
- 3.5. რეზიდენტი პირის პირველადი რეგისტრაცია ბანკის კლიენტად და ანგარიშის გახსნა შესაძლებელია ონბორდინგით, ელექტრონული იდენტიფიკაცია/ვერიფიკაციის მეთოდით, რომლის ფარგლებშიც ბანკი ამუშავებს კლიენტის პერსონალურ მონაცემებს (მათ შორის ბიომეტრიულ ფოტოს).
- 3.6. კლიენტისთვის საბანკო მომსახურების გაწევის მიზნით ბანკი ამუშავებს კლიენტის პერსონალურ მონაცემებს.
- 3.7. კონფიდენციალურობის შეტყობინება განთავსებულია ბანკის ვებ-გვერდზე: <https://halykbank.ge/ka/privacy-notice>

მუხლი 4. საბანკო ანგარიშის წარმოება

- 4.1. ბანკის მიერ ანგარიშის წარმოება ხორციელდება საქართველოს მოქმედი კანონმდებლობის შესაბამისად.
- 4.2. ბანკი ახორციელებს ქვემოთ მითითებულ ოპერაციებს ანგარიშზე და უწევს ამ ოპერაციებთან დაკავშირებულ შემდეგ საბანკო მომსახურებას:
- 4.2.1. ანგარიშზე რიცხავს როგორც კლიენტის, ისე სხვა პირის მიერ ბანკის სალაროში შემოტანილ თანხას, ასევე ანგარიშიდან გასცემს კლიენტზე ნაღდ თანხას;
- 4.2.2. ანგარიშზე რიცხავს კლიენტის მიერ ბანკში გახსნილი მისი სხვა ანგარიშებიდან, ასევე სხვა პირების მიერ კლიენტის სასარგებლოდ გადმორიცხულ თანხას;
- 4.2.3. კლიენტის საგადახდო დავალებების მიხედვით ანგარიშიდან გადარიცხავს თანხას

- კლიენტის ანგარიშებზე რომლებიც გახსნილია ბანკში და სხვა ბანკებში, ასევე მითითებული მესამე პირების სასარგებლოდ;
- 4.2.4. კლიენტის განცხადებების მიხედვით ახორციელებს ვალუტის კონვერტაციას;
- 4.2.5. კლიენტის მოთხოვნის შესაბამისად, ბანკი საოპერაციო დღის განმავლობაში გასცემს ანგარიშის ამონაწერს, ცნობას და სხვა სახის დოკუმენტებს.
- 4.3. ბანკი, კლიენტის ანგარიშზე ყველა სახის ოპერაციას ახორციელებს ანგარიშზე არსებული თანხის ფარგლებში; ოვერდრაფტი გაიცემა, მხოლოდ კლიენტსა და ბანკს შორის წერილობითი და/ან ელექტრონული ფორმით დადებული შეთანხმების საფუძველზე.
- 4.4. ყველა სახის ოპერაციის განხორციელება ანგარიშზე სხვა პირების მეშვეობით შესაძლებელია, კლიენტის მიერ გაცემული სანოტარო წესით დამოწმებული მინდობილობის და სხვა, კანონმდებლობით განსაზღვრული, დოკუმენტის საფუძველზე. შემოსავლის ოპერაციების განხორციელება, მათ შორის სხვა პირების მიერ შესაძლებელია მინდობილობის წარმოდგენის გარეშე.
- 4.5. კლიენტის ანგარიშიდან თანხის ამოღება მისი თანხმობის გარეშე, შესაძლებელია მხოლოდ საქართველოს მოქმედი კანონმდებლობით პირდაპირ დადგენილ შემთხვევაში. ოპერაციების შეჩერება კლიენტის ანგარიშზე და კლიენტის ანგარიშზე არსებული თანხის დაყადაღება, ხორციელდება მხოლოდ შესაბამისი სახით გაფორმებული და უფლებამოსილი ორგანოების მიერ წარმოდგენილი გადაწყვეტილებების საფუძველზე და საქართველოს მოქმედი კანონმდებლობის შესაბამისად. ბანკი არ აგებს პასუხს ასეთ შემთხვევებში მიყენებულ ზიანზე;
- 4.6. კლიენტის ანგარიშზე არსებული თანხის ნაშთზე საპროცენტო სარგებელის დარიცხვა არ ხორციელდება, თუ სხვა რამ არ არის გათვალისწინებული ამ გენერალური ხელშეკრულებითა და დაკავშირებული გარიგებებით.
- 4.7. ბანკი ახდევინებს კლიენტს მომსახურების საკომისიოს საბანკო ანგარიშზე განხორციელებულ ოპერაციებზე და გაწეულ მომსახურებაზე ბანკის ტარიფების შესაბამისად. ბანკი უფლებამოსილია შეიტანოს ცვლილებები მოქმედ ტარიფებში, ცალმხრივად, კლიენტთან წინასწარი შეთანხმების გარეშე ასეთი ცვლილებების ამოქმედებამდე ერთი თვით ადრე ინფორმაცია მომსახურების ტარიფებში ცვლილების შესახებ განთავსებული იქნება ბანკის ფილიალებში (საოპერაციო დარბაზებში) ან ბანკის ვებ-გვერდზე <https://halykbank.ge/ka/individuals/rates>.
- 4.8. მხარეები შეთანხმდნენ, რომ ბანკი უფლებამოსილია განახორციელოს კლიენტის ანგარიშიდან თანხის უაქცეპტო ჩამოწერა კლიენტის ანგარიშზე შეცდომით ჩარიცხული თანხის ფაქტის დადგენის, ასევე, ბანკთაშორის არსებულ პრაქტიკაში გამოვლენილი ფროდის ფაქტის შემთხვევაში.
- 4.9. კლიენტი კისრულობს და ადასტურებს თავის უპირობო და გამოუთხოვად ვალდებულებას, მასზედ რომ ეროვნულ და/ან უცხოურ ვალუტაში გახსნილი ანგარიშებიდან/ანგარიშებზე არ განახორციელოს მის ინდივიდუალურ სამეწარმეო საქმიანობასთან დაკავშირებული გასავლის/შემოსავლის ოპერაციები, ასევე გამორიცხოს ამგვარი ოპერაციების განხორციელება მის ანგარიშზე/ანგარიშებიდან სხვა პირების მიერ, ბანკში საგადასახდო/სამეწარმეო სტატუსის შესახებ ინფორმაციისა და შესაბამისი დოკუმენტაციის წარდგენის გარეშე.
- 4.10. ბანკი უფლებამოსილია შეაჩეროს გადახდის, მათ შორის ჩარიცხვის ოპერაციის შესრულება, თუ ბანკის შეფასებით ოპერაცია მიზნად ისახავს უკანონო შემოსავლების ლეგალიზაციას, კანონსაწინააღმდეგო ქმედების ან/და ტერორიზმსა და სხვა საერთაშორისო დანაშაულებში ბრალდებულ პირთა დაფინანსებას ან ეწინააღმდეგება კანონმდებლობით დადგენილ მოთხოვნებს.
- 4.11. კლიენტის ანგარიშზე ჩარიცხული თანხის ასახვას ბანკი უზრუნველყოფს მოქმედი კანონმდებლობით დადგენილ ვადებში.
- 4.12. ბანკი უფლებამოსილია საქართველოში მოქმედი კანონმდებლობის მოთხოვნების დაცვის შემოწმების მიზნით მოთხოვოს კლიენტს დამატებითი ინფორმაცია და დოკუმენტები, მიმდინარე ოპერაციასთან დაკავშირებით.
- 4.13. კლიენტის ანგარიშზე განხორციელებული გადახდის ოპერაციების შესახებ სრული ინფორმაცია კლიენტისათვის ხელმისაწვდომია ბანკის ფილიალებში (და/ან ინტერნეტ-ბანკის სისტემიდან) ანგარიშიდან ამონაწერის ან/და საგადახდო საბუთის ასლის მიწოდებით ან ცნობის სახით.
- 4.14. ბანკი უფლებამოსილია დამოუკიდებლად და ცალმხრივ რეჟიმში დაადგინოს, მათ შორის შეცვალოს საბანკო ანგარიშის წარმოების წესები და პირობები (მათ შორის ტარიფები - <https://halykbank.ge/ka/individuals/rates>), რომლის თაობაზე კლიენტს ეცნობება ბანკის ვებ-გვერდზე (www.halykbank.ge) გამოქვეყნების გზით და/ან ბანკში დაფიქსირებულ კომუნიკაციის ერთ-ერთი რომელიმე საშუალების გამოყენებით ცვლილებების ამოქმედებამდე ერთი თვით ადრე.

მუხლი 5. საბანკო ანგარიშის წარმოებასთან დაკავშირებით მხარეთა უფლება-მოვალეობანი

- 5.1. ბანკი იძლევა გარანტიას კლიენტის მიერ განხორციელებული ოპერაციების გაუხმაურებლობის შესახებ. კლიენტის წერილობითი თანხმობის გარეშე ბანკის მიერ იმ ცნობების შეთავაზება მესამე პირთათვის, რომელთაც კავშირი აქვთ ანგარიშთან და მასზე განხორციელებულ ოპერაციებთან, ხორციელდება მხოლოდ საქართველოს კანონმდებლობით გათვალისწინებული წესითა და შემთხვევებში, შესაბამისი დოკუმენტების საფუძველზე.
- 5.2. ბანკი უფლებამოსილია უარი განაცხადოს კლიენტის მითითებების შესრულებაზე, თუ ამგვარი მითითება და შესაბამისად წარმოდგენილი დოკუმენტები ეწინააღმდეგება საქართველოს მოქმედი კანონმდებლობის მოთხოვნებს.
- 5.3. ბანკი უფლებამოსილია მოითხოვოს საბანკო ოპერაციასთან და მასში მონაწილე პირებთან დაკავშირებული ნებისმიერი სახის ინფორმაცია ან/და დოკუმენტები. მოთხოვნილი დოკუმენტების წარმოდგენლობის შემთხვევაში ბანკი იტოვებს უფლებას არ შეასრულოს კლიენტის დავალება.
- 5.4. ბანკი უფლებამოსილია უაქცეპტოდ კლიენტის წინასწარი გაფრთხილების გარეშე, წინამდებარე ხელშეკრულების საფუძველზე ჩამოწეროს ანგარიშიდან, ასევე კლიენტის სხვა ანგარიშებიდან იმ საკომისიო სარგებლის თანხები, რაც ეკუთვნის ბანკს, ასევე კლიენტის ანგარიშზე შეცდომით დარიცხული თანხები. კლიენტი აძლევს ბანკს უპირობო და უდავო უფლებას თანხების უაქცეპტოდ ჩამოსაწერად წინამდებარე ხელშეკრულებით განსაზღვრული ოდენობითა და პირობებით, კლიენტის მხრიდან ბანკის საგადახდო დავალებების, ასევე ანგარიშის პირდაპირი დებეტირების ოპერაციებითა და კლიენტის სხვა საბანკო ანგარიშებიდან დამატებითი აქცეპტის გარეშე.
- 5.5. ბანკი უფლებამოსილია უაქცეპტოდ ჩამოაჭრას კლიენტს ანგარიშიდან დამატებითი საკომისიო რომელიც გამოწვეულია გადახდის ოპერაციის განხორციელებაში მონაწილე მიმღები/შუამავალი ბანკის ნებისმიერი ქმედებით (კვლევა, დაზუსტება და სხვა).
- 5.6. კლიენტი ვალდებულია მისცეს ბანკს მითითებები ანგარიშზე იმ ოპერაციების განხორციელების შესახებ, რაც არ ეწინააღმდეგება საქართველოს მოქმედ კანონმდებლობას, იმ დოკუმენტების წარდგენით, რაც გაფორმებულია საქართველოს კანონმდებლობისა და წინამდებარე ხელშეკრულების შესაბამისი წესით.
- 5.7. ბანკი უფლებამოსილია კლიენტის მიერ ანგარიშიდან 50000 აშშ დოლარის ექვივალენტზე მეტი ნაღდი ფულის გატანის შემთხვევაში, მოთხოვოს კლიენტს განაცხადის წარდგენა ერთი სამუშაო დღით ადრე.
- 5.8. კლიენტი ვალდებულია წერილობითი სახით ან მხარესთან შეთანხმებული კავშირის სხვა საშუალებებით დაუყოვნებლივ აცნობოს ბანკს იმ რწმუნებულის შეცვლის, ან მისი უფლებამოსილების ვადაზე ადრე შეწყვეტის შესახებ, რომელსაც მინდობილობის საფუძველზე მიანიჭა ანგარიშის განკარგვის უფლება და წარმოადგინოს დოკუმენტების ორიგინალები, რაც ადასტურებს ამგვარ ცვლილებებს. წინააღმდეგ შემთხვევაში ბანკი არ აგებს პასუხს იმ პირთა ქმედებებზე, რომელთაც მინდობილობის საფუძველზე მინიჭებული აქვთ ანგარიშის განკარგვის უფლება.
- 5.9. კლიენტი ვალდებულია საიდენტიფიკაციო მონაცემების, საცხოვრებელი ადგილის, ტელეფონის ნომრების, ელ.ფოსტის და სხვა ცვლილებების შემთხვევაში, რაც მნიშვნელოვანია წინამდებარე ხელშეკრულების პირობების შესასრულებლად, აცნობოს ბანკს სამი დღის განმავლობაში (ბანკის სამუშაო დღე) წერილობითი ან მხარესთან შეთანხმებული სხვა კავშირის საშუალებებით და წარუდგინოს იმ დოკუმენტების ორიგინალები, რაც ადასტურებს ამგვარ ცვლილებებს.
- 5.10. კლიენტი კისრულობს ვალდებულებას წინამდებარე ხელშეკრულების საფუძველზე აუნაზღაუროს ბანკს მომსახურება ბანკის ტარიფების შესაბამისად.
- 5.11. საკუთარ ანგარიშზე თანხის შეცდომით ჩარიცხვის ფაქტის აღმოჩენის შემთხვევაში, კლიენტი ვალდებულია აცნობოს ბანკს ამის შესახებ, არაუგვიანეს 3 (სამი) საოპერაციო დღის განმავლობაში.
- 5.12. კლიენტის მხრიდან ბანკის მიმართ ნებისმიერი დავალიანების არსებობის შემთხვევაში ბანკი უფლებამოსილია უაქცეპტოდ ჩამოწეროს დავალიანების თანხა კლიენტის ანგარიშ(ებ)იდან, რაზეც კლიენტი აცხადებს უპირობო თანხმობას.
- 5.13. ბანკი უფლებამოსილია დახუროს ანგარიში იმ შემთხვევაში თუ მასზე არ ირიცხება ნაშთი და არ განხორციელებულა ოპერაციები, ბოლო განხორციელებული ოპერაციის თარიღიდან მინიმუმ ორი წლის განმავლობაში (გასავლის ან შემოსავლის ოპერაციები, გადარიცხვები), ასევე მოქმედი კანონმდებლობით გათვალისწინებულ სხვა შემთხვევებში.
- 5.14. ბანკი უფლებამოსილია ანგარიშზე არსებული სახსრები დროებით გამოიყენოს საკრედიტო რესურსის სახით, რომელზეც არ წარმოებს პროცენტის დარიცხვა, თუ მხარეთა შორის დამატებითი შეთანხმებით სხვა რამ არ იქნება გათვალისწინებული.

მუხლი 6. საბანკო ანგარიშის წარმოებასთან დაკავშირებული ურთიერთობიდან გამომდინარე მხარეთა პასუხისმგებლობა და პასუხისმგებლობის გამორიცხვა

- 6.1. ყოველი მხარე აგებს პასუხს მეორე მხარის წინაშე წინამდებარე ხელშეკრულებით აღებული ვალდებულებების დარღვევისათვის საქართველოს კანონმდებლობის შესაბამისად.
- 6.2. მხარეები არ აგებენ პასუხს წინამდებარე ხელშეკრულების პირობების შეუსრულებლობაზე ან არაჯეროვან შესრულებაზე, თუ აღნიშნულის მიზეზია გადაუღაზავი გარემოებები, მათ შორის: სახელმწიფო უფლებამოსილი ორგანოების მიერ შემზღუდავი და/ან ამკრძალავი ხასიათის აქტების/ზომების მიღება, პროგრამული უზრუნველყოფის შეფერხება, პრობლემები, ელექტროენერგიის გათიშვა, კავშირგაბმულობის ხაზების დაზიანება და სხვა გარემოებები, რომლებიც არ არიან დამოკიდებული მხარეების ნებაზე და რომელთაც აქვთ უშუალო კავშირი წინამდებარე ხელშეკრულების საგანთან.
- 6.3. ბანკი არ აგებს პასუხს წინამდებარე ხელშეკრულების პირობების შეუსრულებლობაზე/არაჯეროვან შესრულებაზე, თუ აღნიშნულის მიზეზია სახელმწიფო უფლებამოსილი ორგანოებისა და/ან თანამდებობის პირების გადაწყვეტილებების/დადგენილებების ბანკისათვის მიწოდება, რომლითაც ხდება ანგარიშზე საანგარიშსწორებო ოპერაციების შეჩერება, ანგარიშზე თანხის დაყადაღება, ასევე მესამე პირების მითითება, რომლებსაც აქვთ სახსრების უაქცეპტო ჩამოწერის უფლება საქართველოს კანონმდებლობის შესაბამისად.
- 6.4. ბანკი არ აგებს პასუხს იმ გადახდის ოპერაციის ვალდებულების შეუსრულებლობისათვის, რომელიც გამოწვეულია კლიენტის მიერ თანხის მიმღები პირის არასწორის რეკვიზიტების წარმოდგენით. ასევე, გადახდის ოპერაციის განხორციელებაში მონაწილე მიმღები/შუამავალი ბანკის ნებისმიერი ქმედებით, მიმღები/შუამავალი ბანკის მიერ ოპერაციის შესრულებაზე უარის თქმით, მიმღების/შუამავალი ბანკის სახელმწიფოში ან სახელმწიფოსთვის დაწესებული ემბარგოს/აკრძალვის შედეგად და სხვა, ბანკისგან დამოუკიდებელი მიზეზებით.
- 6.5. ბანკი არ აგებს პასუხს პირთა ქმედებაზე, რომლებსაც მინიჭებული აქვთ ანგარიშის მართვის უფლებამოსილება კლიენტის მიერ, თუ უფლებამოსილების ვადამდე შეწყვეტის ან სხვა პირებით ჩანაცვლების შესახებ მას არ/დაგვიანებით აცნობეს აღნიშნულის შესახებ.
- 6.6. ნებისმიერ შემთხვევაში ბანკის პასუხისმგებლობა წინამდებარე ხელშეკრულების პირობათა დარღვევისას შემოიფარგლება ბანკის არამართლზომიერი მოქმედებით/უმოქმედობით კლიენტისათვის მიყენებული რეალური ზიანის ფარგლებში.
- 6.7. თუ კლიენტი საგადახდო დავალების არასწორი შესრულების შესახებ არ აცნობებს ბანკს ვადაში, რომელიც მოცემულია წინამდებარე ხელშეკრულებით, კლიენტი აგებს პასუხს ბანკისათვის მიყენებულ ფაქტიურ ზიანზე საქართველოს სამოქალაქო კოდექსის მიერ განსაზღვრული წესით და ოდენობით.
- 6.8. პასუხისმგებლობა თანხების უსაფუძვლოდ უაქცეპტო ჩამოწერისთვის კლიენტის ანგარიშიდან მესამე პირების (საინკასო დავალებით) მითითებით, ეკისრებათ ამგვარი მითითებების გამცემებს. ასეთ შემთხვევაში ბანკის მიმართ კლიენტის პრეტენზიები ანგარიშიდან თანხების ჩამოწერის შესახებ არ განიხილება.
- 6.9. ანგარიშთან მიმართებაში ჩატარებული საბანკო ოპერაციებისა და მომსახურების საკომისიოს ბანკისათვის გადახდის დაგვიანების შემთხვევაში, ბანკი უფლებამოსილია დააკისროს, ხოლო ასეთ შემთხვევაში კლიენტი ვალდებულია გადაუხადოს ბანკს პირგასამტეხლო 0,5 %-ის ოდენობით ყოველ გადაცილებულ დღეზე საკომისიოს გადაუხდელი ან/და დაგვიანებით გადახდილი თანხიდან.

თავი 3. დისტანციური მომსახურება

მუხლი 7. ინტერნეტ ბანკის სისტემა, ინტერნეტ-ბანკის სისტემის გააქტიურება (აგტორიზება)

- 7.1. „ინტერნეტ-ბანკი ფიზიკური პირებისათვის“ სისტემა - საბანკო მომსახურების დისტანციური სისტემა, რომელიც გულისხმობს ბანკში გამოუცხადებლად კლიენტის მიერ ბანკის სპეციალური ინტერნეტ-გვერდის www.myhalyk.ge ან/და მობაილ ბანკის აპლიკაციის გამოყენებით ბანკის მიერ განსაზღვრული საბანკო ინფორმაციის მიღებას, სხვადასხვა საბანკო მომსახურებით (სერვისით) სარგებლობისთვის რეგისტრაციას, ლიმიტების ფარგლებში სხვადასხვა საბანკო ოპერაციის განხორციელებას. (შემდგომში - ინტერნეტ-ბანკის სისტემა).
- 7.2. ბანკის მიერ ინტერნეტ-ბანკის სისტემით მომსახურება ხორციელდება კლიენტის მიერ გამოხატული ნების (ბანკში განაცხადის წარდგენით და/ან თვითრეგისტრაციით ინტერნეტ-გვერდიდან <https://myhalyk.ge> ან/და მობაილ ბანკიდან აპლიკაციის) საფუძველზე. კლიენტის განაცხადის დაკმაყოფილების შემთხვევაში ბანკი ანიჭებს კლიენტს საშუალებას მის საბანკო ანგარიშებზე საბანკო ოპერაციები განახორციელოს დისტანციურად, კერძოდ ინტერნეტ-ბანკის

სისტემის საშუალებით და ამავე საშუალების გამოყენებით ბანკს წარუდგინოს განცხადება წინამდებარე გენერალური ხელშეკრულებით გათვალისწინებული საბანკო მომსახურების მიღებაზე. მომსახურების ძირითადი პირობები მოცემულია ინტერნეტ-ბანკის სისტემის მომსახურების ზოგად პირობებში, რომელიც არის წინამდებარე ხელშეკრულებასთან დაკავშირებული გარიგება და განთავსებულია ბანკის ვებ-გვერდზე.

- 7.3. ბანკის მხრიდან ინტერნეტ-ბანკის სისტემაში პირის რეგისტრაცია გულისხმობს ბანკში დადგენილი წესებისა და მოთხოვნების შესაბამისად პირის წინასწარი იდენტიფიკაციის საფუძველზე, ბანკის კლიენტისათვის მომხმარებლის სახელის მინიჭებას; მისთვის მომხმარებლის სახელის, ინტერნეტ-ბანკის სისტემაში შესასვლელი ერთჯერადი პაროლის და ერთჯერადი კოდის მაგენერირებელი საშუალების გადაცემას.
- 7.4. წინამდებარე გენერალური ხელშეკრულებით განსაზღვრული კლიენტის ვალდებულებები სრულად ვრცელდება ინტერნეტ-ბანკის სისტემაში წვდომის დასაშვებად ბანკის მიერ ინტერნეტ-ბანკის სისტემაში რეგისტრირებულ კლიენტის მომხმარებელზე, რომლის მეშვეობითაც კლიენტს ინტერნეტ-ბანკის სისტემაში ეძლევა ცალკეული ოპერაციების და/ან ქმედების განხორციელების შესაძლებლობა.
- 7.5. ინტერნეტ-ბანკის სისტემაზე წვდომის უფლება შესაძლებელია მიენიჭოს კლიენტის მინდობილ პირს, კლიენტის მიერ გაცემული სანოტარო წესით დამოწმებული მინდობილობის საფუძველზე და/ან უფლებამოსილ პირს - უფლებამოსილი ორგანოს მიერ გაცემული დოკუმენტის საფუძველზე მინიჭებული უფლებამოსილების ფარგლებში. ასეთ შემთხვევაში ინტერნეტ-ბანკის სისტემის მომხმარებლად რეგისტრირდება თავად კლიენტი, ხოლო მომხმარებლის მართვის/განკარგვის უფლება ენიჭება უფლებამოსილ/მინდობილ პირს მისი უფლებამოსილების ფარგლებში.
- 7.6. კლიენტსა და ბანკს შორის კომუნიკაცია მყარდება ელექტრონულ ფორმატში. აღნიშნული სახით (ელექტრონული ფორმით) კომუნიკაციას გააჩნია იურიდიული ძალა და ითვლება მხარის მიერ სამართლებრივი ნების გამოვლენად.

მუხლი 8. ინტერნეტ-ბანკის სისტემით სარგებლობის ძირითადი დებულებები

- 8.1. ბანკი კლიენტს ინტერნეტ-ბანკის სისტემაზე წვდომის უფლებას ანიჭებს მის მიერ ბანკისათვის წარდგენილი განაცხადში მითითებული ინფორმაციის შესაბამისად.
- 8.2. ბანკს ინტერნეტ-ბანკის სისტემაში წვდომის მინიჭებისთვის დადგენილი აქვს სავალდებულო საიდენტიფიკაციო მონაცემების ერთობლიობა: მომხმარებლის სახელი, პაროლი და ერთჯერადი კოდის მაგენერირებელი საშუალება: eToken Pass ან SMS Pass-ით მიღებული ერთჯერადი კოდი.
- 8.3. ინტერნეტ-ბანკის სისტემაში ავტორიზაციისათვის სავალდებულო ამ მუხლის 8.2. პუნქტით განსაზღვრული მონაცემების გადაცემა/გაგზავნა კლიენტისათვის ხდება, ბანკში დადგენილი ინტერნეტ-ბანკის სისტემით მომსახურების ზოგადი პირობების შესაბამისად, რომელიც ამ ხელშეკრულების განუყოფელი ნაწილია და განთავსებულია ბანკის ვებ-გვერდზე: <https://halykbank.ge>.
- 8.4. კლიენტი ოპერაციებს აწარმოებს ინტერნეტ-ბანკის სისტემაში დაშვების შემდეგ. დაშვება ხდება ბმულის: <https://myhalyk.ge> ან/და მობაილ ბანკის აპლიკაციის გამოყენებით, ბანკის მიერ კლიენტისათვის მიწოდებული მომხმარებლის სახელით, ერთჯერადი პაროლით და ერთჯერადი კოდით.
- 8.5. მომხმარებლის მიერ ინტერნეტ-ბანკის სისტემის მეშვეობით გენერირებული ნებისმიერი ელექტრონული დოკუმენტი, ასევე ინტერნეტ-ბანკის სისტემის მეშვეობით მის მიერ გაცემული დასტური ხელშეკრულების და/ან შეთანხმების პირობებზე, ტოლფასია ქაღალდის მატარებელზე დატანილი შესაბამისი ხელშეკრულების და/ან შეთანხმების პირობებზე კლიენტის ნების ხელმოწერით დადასტურებისა. ხელშეკრულების/შეთანხმების პირობებზე ინტერნეტ-ბანკის სისტემის მეშვეობით კლიენტის დასტურის მიღებისთანავე, აღნიშნულ ხელშეკრულებას/შეთანხმებას ენიჭება სამართლებრივი ძალა.
- 8.6. კლიენტს ინტერნეტ-ბანკის სისტემის მეშვეობით პაროლის ცვლილების, ინტერნეტ-ბანკის სისტემის მეშვეობით ოპერაციების წარმოების, ელექტრონული დოკუმენტების (მათ შორის განაცხადების) გენერირების და/ან სხვა ქმედებების განხორციელების უფლება ენიჭება იმ შემთხვევაში, თუ მიმდინარე თარიღისათვის არსებული მომხმარებლის სახელით წარმატებით გაივლის იდენტიფიკაციას.
- 8.7. მომხმარებლის ინტერნეტ-ბანკის სისტემაში დაშვების გარდა, ერთჯერადი ავტორიზაციის კოდი საჭიროა, ინტერნეტ-ბანკის სისტემის მეშვეობით შესრულებული ოპერაციის და/ან ქმედების საბოლოო ავტორიზებისათვის. ბანკი უფლებამოსილია თავად განსაზღვროს იმ ოპერაციების ჩამონათვალი, რომლის დროსაც სავალდებულოა ერთჯერადი კოდის გამოყენება.
- 8.8. კლიენტს ინტერნეტ-ბანკის სისტემის მომხმარებლის მეშვეობით, ინტერნეტ-ბანკის სისტემაში

ოპერაციების განხორციელების და/ან მომსახურების მიღების შესახებ შესაბამისი დოკუმენტის ფორმირება და ავტორიზაცია შეუძლია ნებისმიერ კალენდარულ დღეს, 24 საათის განმავლობაში, ხოლო მათი შესრულება წარმოებს ბანკში დადგენილი ინტერნეტ-ბანკის სისტემის მომსახურების ზოგადი პირობების შესაბამისად, რომელიც ამ ხელშეკრულების განუყოფელ ნაწილს წარმოადგენს და კლიენტი ადასტურებს, რომ მისი ყველა პუნქტი ცნობილია კლიენტისათვის.

- 8.9. ინტერნეტ-ბანკის სისტემით მომსახურებისას ოპერაციის განხორციელება ყოველთვის არ არის სინქრონული მიღებულ დავალებასთან და დავალება შეიძლება ვერ შესრულდეს ამ დავალების გაცემისთანავე. ზოგიერთი საკითხის დამუშავებას შეიძლება დაჭირდეს გარკვეული დრო, გარდა კანონმდებლობით გათვალისწინებული შემთხვევებისა.
- 8.10. წინამდებარე ხელშეკრულებით გათვალისწინებული რეგულაციების გარდა მხარეების ურთიერთობები დაკავშირებული საბანკო ოპერაციების განხორციელებასთან (ტარიფები, წინაპირობები და ა.შ.), რეგულირდება ბანკში დადგენილი ინტერნეტ-ბანკის სისტემის მომსახურების ზოგადი პირობების შესაბამისად (განთავსებულს ბანკის ვებ-გვერდზე, რომელიც წინამდებარე ხელშეკრულების შემადგენელ ნაწილად განიხილება), შესაბამისი კანონმდებლობით, და მხარეებს შორის გაფორმებული სხვა ხელშეკრულებებით.

მუხლი 9. ინტერნეტ-ბანკის სისტემით სარგებლობიდან გამომდინარე მხარეთა უფლება-მოვალეობები და პასუხისმგებლობა

9.1. ბანკი უფლებამოსილია:

- 9.1.1. გააუმჯობესოს მომსახურება, შეცვალოს მომსახურების მახასიათებლები.
- 9.1.2. კლიენტის აქტიურ ოპერაციებზე (გადარიცხვები, კონვერტაციები და ა.შ) ცალმხრივად დააწესოს შეზღუდვები და დაადგინოს ასეთი ოპერაციების ზღვრული დასაშვები ოდენობები ან მოცულობები (ერთჯერადი გადარიცხვის მაქსიმალური თანხა, გარკვეულ პერიოდში ჯამურად გადასარიცხი თანხის მაქსიმალური ოდენობა, გადარიცხვების მაქსიმალური რაოდენობა და ა.შ). აღნიშნული შეზღუდვის შესახებ კლიენტს ეცნობება უშუალოდ შეტყობინებით და/ან ბანკის ვებ-გვერდზე განთავსებული პირობებით, ცვლილებების განხორციელებამდე/დადგენამდე 30 კალენდარული დღით ადრე
- 9.1.3. ოპერაციის განხორციელებისათვის კლიენტს მოსთხოვოს კანონმდებლობით/ბანკის შიდა მარეგლამენტირებული წესებით გათვალისწინებული დოკუმენტი და აღნიშნული დოკუმენტის წარმოდგენლობის შემთხვევაში არ მისცეს ოპერაციის განხორციელების უფლება.
- 9.1.4. საკუთარი შეხედულებისამებრ, დააწესოს დამატებითი მოთხოვნები კლიენტისათვის ინტერნეტ-ბანკის სისტემით მომსახურების მისაღებად. აღნიშნული მოთხოვნების დაუკმაყოფილებლობის შემთხვევაში, ბანკი იტოვებს უფლებას, უარი განუცხადოს კლიენტს ინტერნეტ-ბანკის სისტემაში კლიენტის რეგისტრაციასა და/ან მომსახურების გაწევაზე.
- 9.1.5. კლიენტს გაუხსნას საბანკო ანგარიშები ინტერნეტ-ბანკის სისტემიდან კლიენტის სახელზე რეგისტრირებული მომხმარებლის მიერ ინიცირებული განაცხადის საფუძველზე ბანკში დადგენილი წესების შესაბამისად და/ან კლიენტს განუცხადოს უარი ანგარიშის გახსნაზე მიზეზის აუხსენილად.
- 9.1.6. უსაფრთხოების დაცვის მიზნით, ცალმხრივად დააწესოს შეზღუდვები და/ან დაბლოკოს ინტერნეტ-ბანკის სისტემის მომხმარებელი, თუ ბანკისათვის საეჭვოა მომხმარებლის ქმედება და/ან ბანკის შეხედულებისამებრ ირღვევა უსაფრთხოების ნორმები, ამასთანავე აღნიშნულის შესახებ ბანკი არ არის ვალდებული წინასწარ აცნობოს კლიენტს.
- 9.1.7. არ მიიღოს და/ან შეასრულოს კლიენტის მიერ ინტერნეტ-ბანკის სისტემის მეშვეობით გამოგზავნილი დავალება, თუ იგი არ შეესაბამება ან/და ეწინააღმდეგება კანონმდებლობით განსაზღვრულ მოთხოვნებს და/ან ბანკში დადგენილ წესებს და/ან კლიენტის ანგარიშებზე არ არის დავალების შესასრულებლად საჭირო ოდენობის თანხა.

9.2. ბანკი ვალდებულია:

- 9.2.1. კლიენტის მომხმარებლის იდენტიფიცირების საფუძველზე, ინტერნეტ-ბანკის სისტემაში შესვლის შემდეგ, უზრუნველყოს კლიენტის ანგარიშებზე, გადარიცხვებსა და ინტერნეტ-ბანკის სისტემაში არსებულ სხვა სერვისებზე ხელმისაწვდომობა.
- 9.2.2. უზრუნველყოს ინტერნეტ-ბანკის სისტემით მომსახურების ზოგად პირობებში ცვლილებების და სიახლეების შესახებ ინფორმაციის განთავსება ბანკის ვებ-გვერდზე.
- 9.2.3. ტექნიკური შეფერხების შემთხვევაში ბანკისათვის მისაღები ფორმით აცნობოს კლიენტს აღნიშნულის თაობაზე.
- 9.2.4. ბანკის მიერ გამოცხადებულ სამუშაო საათების განმავლობაში მიიღოს და შეასრულოს ინტერნეტ-ბანკის სისტემიდან მიღებული საბანკო ტრანზაქციის გაუქმება/შეჩერებასთან დაკავშირებული კლიენტის ელექტრონული მომართვა, თუ იგი გამოგზავნილი იქნება ინტერნეტ-ბანკის

სისტემიდან ელექტრონული შეტყობინებით ამ ტრანზაქციის შესრულებაზე დავალების მიცემიდან არაუმეტეს 1 საათის განმავლობაში და ბანკის მხრიდან ამ საბანკო ტრანზაქციის შესრულებამდე (არასამუშაო საათებში გამოგზავნილი/მიღებული მომართვა ექვემდებარება შესრულებას სამუშაო საათებში იმ პირობით, თუ მომართვით გათვალისწინებული ტრანზაქცია არ იქნება შესრულებული ბანკის მიერ). შემდგომში გაურკვევლობის თავიდან არიდების მიზნით, ნებისმიერი მომართვა, რომელსაც ბანკი მიიღებს კლიენტის მომხმარებლის სახელით ინტერნეტ-ბანკის სისტემიდან, ექვემდებარება შესრულებას (გარდა ინტერნეტ-ბანკის სისტემის მეშვეობით საბანკო ტრანზაქციის განხორციელებაზე) და მასზე, მათ შორის ნამდვილობასა და შინაარსზე, ბანკს არ ეკისრება პასუხისმგებლობა.

9.2.5. დაიცვას კონფიდენციალობა.

9.2.6. კლიენტის მიერ საიდენტიფიკაციო მონაცემ(ებ)ის დაკარგვის შესახებ გაცხადების მიღების შემთხვევაში, დაუყოვნებლივ შეზღუდოს/დაბლოკოს კლიენტის მომხმარებლის წვდომა ინტერნეტ-ბანკის სისტემაში, კლიენტის მხრიდან ახალი განკარგულების გაცემამდე.

9.3. კლიენტი ვალდებულია:

9.3.1. დარწმუნდეს, რომ დაუკავშირდა ბანკის ოფიციალურ ინტერნეტ-გვერდს www.myhalyk.ge ან/და [მობილ ბანკის აპლიკაციას](#) და ინტერნეტ-ბანკის სისტემაში შესვლისას შეამოწმოს თავისი საიდენტიფიკაციო მონაცემების სისწორე.

9.3.2. მკაცრად დაიცვას უსაფრთხოების ნორმები: უსაფრთხოდ, მესამე პირის წვდომისაგან დაცულად შეინახოს ინტერნეტ-ბანკის სისტემაში დაშვებისათვის აუცილებელი საიდენტიფიკაციო მონაცემები და დაიცვას კონფიდენციალობა, არ გაანდოს პაროლი და არ გადასცეს სხვა პირებს ერთჯერადი კოდის მაგენერირებული საშუალებები.

9.3.3. ბანკის მოთხოვნის შემთხვევაში, ინტერნეტ-ბანკის სისტემის მეშვეობით/ბანკის ფილიალებში პირადად, წარმოადგინოს რეგისტრაციისთვის/ოპერაციის განსახორციელებლად საჭირო დოკუმენტ(ებ)ი.

9.3.4. დაიცვას და იხელმძღვანელოს ბანკში დადგენილი ინტერნეტ-ბანკის სისტემის მომსახურების ზოგადი პირობებით, რომელიც განთავსებულია ბანკის ოფიციალურ ვებ-გვერდზე და რომელიც წარმოადგენს წინამდებარე ხელშეკრულების განუყოფელ ნაწილს.

9.4. კლიენტი უფლებამოსილია:

9.4.1. ინტერნეტ-ბანკის სისტემის მეშვეობით განხორციელებულ ოპერაციებთან დაკავშირებით წარადგინოს პრეტენზიები ასეთი ოპერაციის განხორციელებიდან 10 კალენდარული დღის ვადაში.

9.4.2. მომხმარებლის სახელის ან/და პაროლის დაკარგვის/დავიწყების ან/და ერთჯერადი კოდის მაგენერირებული საშუალების დაკარგვის/დაზიანების შემთხვევაში, კლიენტს უფლება აქვს ბანკისაგან მიიღოს მომხმარებლის სახელი/ახალი პაროლი ან/და ერთჯერადი კოდის მაგენერირებული ახალი საშუალება (შესაბამისი ტარიფის გადახდის შემდეგ).

9.5. კლიენტი აცხადებს თანხმობას და ადასტურებს, რომ:

9.5.1. კლიენტი აცხადებს თანხმობას, რომ მის მიერ ბანკში დაფიქსირებულ ტელეფონის ნომერზე, ელ-ფოსტაზე და სხვა საკომუნიკაციო საშუალებებზე მიიღოს ბანკის მიერ გამოგზავნილი ნებისმიერი საკომუნიკაციო არხით ნებისმიერი შინაარსის მქონე შეტყობინება.

9.5.2. აცნობიერებს და იღებს პასუხისმგებლობას ნებისმიერ ოპერაციაზე და/ან ქმედებაზე, რომელიც შესრულდება მის სახელზე რეგისტრირებული მომხმარებლის სახელით ინტერნეტ-ბანკის სისტემაში;

9.5.3. უფლებამოსილებას ანიჭებს ბანკს, რომ მის მიერ ინტერნეტ-ბანკის სისტემაში ანგარიშის გახსნაზე გამოხატული ნების (ელექტრონული განაცხადის გაგზავნის საფუძველზე) საფუძველზე, უზრუნველყოს ანგარიშების გახსნა ბანკში დადგენილი პირობებისა და წესების და საქართველოს ეროვნული ბანკის მიერ შემუშავებული სამართლებრივი ნორმების დაცვით.

9.5.4. მის მიერ ინტერნეტ-ბანკის სისტემაში განაცხადის/ხელშეკრულების/შეთანხმების პირობებზე/ინტერნეტ-ბანკის სისტემაში მითითებული ან/და საჯარო წყაროების მეშვეობით მოპოვებული მისი პერსონალური მონაცემების გამოთხოვასა და დამუშავებაზე გამოხატული თანხმობა ჩაითვლება სამართლებრივი ძალის მქონედ თანხმობის გამოხატვის მომენტიდან.

9.6. ბანკი არ არის პასუხისმგებელი:

9.6.1. კლიენტის ტექნიკური საშუალებების/ინტერნეტ კავშირის გაუმართავობით ან ბანკისაგან დამოუკიდებელი მიზეზებით გამოწვეულ ოპერაციების ჩატარების შეუძლებლობის შემთხვევებზე.

9.6.2. კლიენტის მიერ განაცხადის არასწორი, არასრულყოფილი ან მცდარი მონაცემებით შევსებით ან/და ინტერნეტ-ბანკის სისტემის საშუალებით გადარიცხვისას არასწორი რეკვიზიტების გამოყენებით გამოწვეულ შედეგებზე.

9.6.3. ბანკის რეკომენდაციების შეუსრულებლობით გამოწვეულ შედეგებზე.

- 9.6.4. ნებისმიერი პირის მიერ კლიენტის ინტერნეტ-ბანკის სისტემაში დაშვებისათვის სავალდებულო საიდენტიფიკაციო მონაცემების არაავტორიზებულად გამოყენების შემთხვევაში;
- 9.6.5. ინტერნეტ-ბანკის სისტემის ისეთ არასანქცირებულ გამოყენებაზე, რომელიც განპირობებულია კლიენტის ბრალეულობით.
- 9.6.6. ინტერნეტ-ბანკის სისტემასთან კომუნიკაციისა და წვდომის უსაფრთხო საშუალებების / არხების გარეშე განხორციელებულ ტრანზაქციებსა და მათ შედეგებზე.
- 9.6.7. კლიენტისათვის განკუთვნილი მონაცემებით მესამე პირების მიერ სანქცირებულად და/ან არასანქცირებულად ინტერნეტბანკის სისტემით სარგებლობისას, თუ აღნიშნული მონაცემების მოპოვებაში ბანკს არ მიუძღვის ბრალი. ამასთან, ინტერნეტ-ბანკის სისტემის გარეთ მესამე პირების მიერ კლიენტისათვის განკუთვნილი მონაცემების მოპოვებაზე ბანკს ასევე არ ეკისრება პასუხისმგებლობა.

მუხლი 10. სატელეფონო მომსახურება

- 10.1 სატელეფონო მომსახურება გულისხმობს კლიენტის მიერ ბანკში გამოუცხადებლად, ბანკის კონტაქტ-ცენტრის მეშვეობით, ბანკში არსებული ინფორმაციის/მომსახურების მიღებას.
- 10.2 სატელეფონო მომსახურებით კლიენტს მიეწოდება შემდეგი ინფორმაცია/მომსახურება:
 - 10.2.1. კლიენტის არსებული ანგარიშების შესახებ ინფორმაცია (მათ შორის მიმდინარე/საბარათო/შემნახველი ანგარიშები);
 - 10.2.2. კლიენტის მიერ შესრულებული ფინანსური ოპერაციების შესახებ ინფორმაცია;
 - 10.2.3. საგადახდო ბარათებთან დაკავშირებული ინფორმაცია/მომსახურება;
 - 10.2.4. კლიენტის სარგებლობაში არსებულ საკრედიტო პროდუქტებთან დაკავშირებული ინფორმაცია;
 - 10.2.5. ინტერნეტ ბანკის სისტემასთან დაკავშირებული ინფორმაცია/მომსახურება.
- 10.3 სატელეფონო მომსახურება ვრცელდება კლიენტის ყველა საბანკო ანგარიშზე.
- 10.4 კლიენტისთვის სატელეფონო მომსახურების გასაწევად ბანკი კლიენტის იდენტიფიკაციის მიზნებისთვის გამოიყენებს ბანკის მიერ წინასწარ დადგენილ პროცედურებს (მათ შორის, სმს ვერიფიკაციას/კოდურ სიტყვას/იდენტიფიკაციის დამატებით პარამეტრებს). იდენტიფიცირების პროცედურის გავლის გარეშე კლიენტი ვერ მიიღებს ამ ხელშეკრულების 10.2 პუნქტში აღწერილ სატელეფონო მომსახურებას. ამასთან, ბანკთან ყოველი სატელეფონო კავშირისას (სატელეფონო მომსახურების მიღების ყოველ ჯერზე) კლიენტმა უნდა გაიაროს იდენტიფიცირების პროცედურა.
- 10.5 ბანკი უფლებამოსილია უარი უთხრას სატელეფონო მომსახურებაზე პირს, რომელიც არ ან ვერ გაივლის იდენტიფიცირების პროცედურას.
- 10.6 კლიენტის მიერ მობილური ნომრის შეცვლის/გაუქმების შემთხვევაში, ინფორმაციის ბანკისთვის მიწოდებაზე პასუხისმგებელია კლიენტი.
- 10.7 თუ კლიენტი დაუყოვნებლივ არ შეატყობინებს ბანკს მობილურის ნომრის ცვლილების თაობაზე, კლიენტის მონაცემებში არსებული მობილურის ნომრიდან გაგზავნილი/მიღებული დავალება ჩაითვლება კლიენტის მიერ გაგზავნილად/მიღებულად და ბანკი არ არის პასუხისმგებელი შესაძლო ზიანზე/ზარალზე.

თავი 4. ელექტრონული ხელმოწერის პირობები

მუხლი 11. დოკუმენტის SMS კოდით დადასტურების პირობები

- 11.1 ბანკი უფლებამოსილია კლიენტს შესთავაზოს ბანკის შიდა წესებითა და პროცედურების შესაბამისად განსაზღვრული ოპერაციის ან/და დავალების, კლიენტის მიერ მატერიალურ დოკუმენტზე ხელმოწერის ნაცვლად SMS კოდით დადასტურება.
- 11.2 საბანკო ოპერაციის ან/და დავალების SMS კოდით დადასტურების მიზნით, კლიენტის მიერ დასახელებულ და ბანკში წინასწარ განსაზღვრულ ძირითად მობილურ ნომერზე ბანკი აგზავნის: (ა) SMS კოდს; და (ბ) დასადასტურებელი ოპერაციის ან/და დავალების შინაარს/დეტალურ მონაცემებს, რომლსაც ბანკი განსაზღვრავს შესასრულებელი საბანკო ოპერაციის ან/და დავალების შესაბამისად, საკუთარი შეხედულებისამებრ განსაზღვრული ფორმით.
- 11.3 კლიენტი, ბანკისგან მიღებული SMS კოდის ბანკის თანამშრომლისთვის მიწოდებით (SMS კოდს კლიენტი ბანკის თანამშრომელს აწვდის ზეპირსიტყვიერად), ადასტურებს, რომ ის სრულად გაეცნო შესაბამისი SMS კოდით დასადასტურებელ საბანკო ოპერაციის ან/და დავალების შინაარსს, ეთანხმება მასში არსებული პირობების/ინფორმაციის სისწორეს და სურს აღნიშნული SMS კოდით დასადასტურებელი საბანკო ოპერაციის ან/და დავალების დადასტურება.
- 11.4 კლიენტისთვის ცნობილია და ადასტურებს, რომ SMS კოდით საბანკო ოპერაციის ან/და

დავალების დადასტურებას აქვს იგივე სამართლებრივი ძალა, რაც კლიენტის მიერ მატერიალურ დოკუმენტზე შესრულებულ მატერიალურ ხელმოწერას.

- 11.5 კლიენტის მოთხოვნის შემთხვევაში, ბანკი კლიენტს მიაწვდის შესაბამისი SMS კოდით დადასტურებული საბანკო ოპერაციის ან/და დავალების დამადასტურებელი დოკუმენტის მატერიალურ ასლს.
- 11.6 ბანკი არ არის პასუხისმგებელი იმ ზიანზე/ზარალზე, რომელიც შესაძლოა დადგეს კლიენტის მიერ ბანკისთვის არასწორად მითითებულ მობილურ ნომერზე SMS კოდის გაგზავნის შედეგად.

მუხლი 12. საკრედიტო ხელშეკრულების ელექტრონული ხელმოწერით დადასტურების პირობები

- 12.1. ბანკი უფლებამოსილია კლიენტს შესთავაზოს ბანკის შიდა წესებითა და პროცედურების შესაბამისად განსაზღვრული საკრედიტო ხელშეკრულებების მატერიალური ხელმოწერით გაფორმების ნაცვლად, ელექტრონული ხელმოწერით დადასტურება.
- 12.2 საკრედიტო ხელშეკრულების ელექტრონული ხელმოწერით დადასტურების მიზნით, კლიენტის მიერ წინასწარ განსაზღვრულ ძირითად ელ.ფოსტაზე ეგზავნება ყველა ხელმოსაწერი დოკუმენტი და ძირითად მობილურის ნომერზე დამატებითი ავთენტიფიკაციის ერთჯერადი კოდი.
- 12.3 წინასწარ განსაზღვრულ ძირითად მობილურის ნომერზე მიღებული SMS კოდის გამოყენებით კლიენტისთვის ხელმისაწვდომი ხდება მასთან გაგზავნილი საკრედიტო ხელშეკრულებები, ხოლო ელექტრონული ხელმოწერით კლიენტი ადასტურებს, რომ ის სრულად გაეცნო, ელ. ფოსტაზე მიღებულ დოკუმენტებს, ეთანხმება მასში არსებულ პირობებს/ინფორმაციის სისწორეს.
- 12.4 ელექტრონულ დოკუმენტსა და ხელმოწერას მხარეთათვის აქვს მატერიალური დოკუმენტისა და შესაბამისად, მატერიალური ხელმოწერის თანაბარი იურიდიული ძალა.
- 12.5 კლიენტის მოთხოვნის შემთხვევაში, ბანკი კლიენტს მიაწვდის ელექტრონულად ხელმოწერილი ხელშეკრულების მატერიალურ ასლს.
- 12.6 ბანკი არ არის პასუხისმგებელი იმ ზიანზე/ზარალზე, რომელიც შესაძლოა დადგეს კლიენტის მიერ ბანკისთვის არასწორად მითითებულ ელ.ფოსტაზე და მობილურ ნომერზე დოკუმენტების გაგზავნის შედეგად.

თავი 5. დეპოზიტის / ანაზრის გახსნა

მუხლი 13. დეპოზიტის / ანაზრის გახსნა

- 13.1. კლიენტის განაცხადის დაკმაყოფილების შემთხვევაში ბანკი კლიენტის განცხადებაში გათვალისწინებული მონაცემების შესაბამისად გაუხსნის კლიენტს ანაზრს /დეპოზიტს.
- 13.2. კლიენტს ანაზრის/დეპოზიტის გახსნა, შესაბამისი განცხადების წარმოდგენით, შეუძლია ბანკის მიერ ანაზრის/ დეპოზიტის გახსნასთან დაკავშირებით დადგენილი პირობების შესაბამისად, რომელიც კლიენტისათვის ხელმისაწვდომია ბანკის ვებ-გვერდისა და ინტერნეტ-ბანკის სისტემის (ამ მომსახურებით სარგებლობის შემთხვევაში) მეშვეობით.
- 13.3. ანაზრის/დეპოზიტის გახსნასთან დაკავშირებით კლიენტის განაცხადის დაკმაყოფილების შემთხვევაში ბანკსა და კლიენტს შორის სახელშეკრულებო ურთიერთობა წინამდებარე გენერალურ ხელშეკრულებასთან ერთად რეგულირდება შესაბამისი დაკავშირებული გარიგებ(ებ)ით გათვალისწინებული პირობებით, რომელიც კლიენტისათვის ხელმისაწვდომია ბანკის ვებ-გვერდისა და ინტერნეტ-ბანკის სისტემის (ამ მომსახურებით სარგებლობის შემთხვევაში) მეშვეობით.
- 13.4. შემდგომში გაურკვევლობის თავიდან არიდების მიზნით, ინტერნეტ-ბანკის სისტემის მომსახურებით სარგებლობის შემთხვევაში ანაზარი/დეპოზიტი კლიენტს შეიძლება გაეხსნას, ბანკისათვის ელექტრონულ ფორმაში განცხადების წარდგენისა და ამ განცხადების ბანკის მიერ ინტერნეტ-ბანკის სისტემით დაკმაყოფილების გზით, რა დროსაც ბანკსა და კლიენტს შორის სახელშეკრულებო ურთიერთობა ყალიბდება წინამდებარე გენერალური ხელშეკრულებითა და დაკავშირებული გარიგებ(ებ)ით გათვალისწინებული შესაბამისი პირობების მიხედვით.

თავი 6. საგადახდო ინსტრუმენტებით მომსახურება

მუხლი 14. საგადახდო ინსტრუმენტებით მომსახურება

- 14.1. კლიენტისათვის წინამდებარე გენერალური ხელშეკრულებით ხელმისაწვდომი და დასაშვები საგადახდო ინსტრუმენტებით მომსახურების პროდუქტებს, სახეებს, პირობებსა და ფორმებს დამოუკიდებლად და ცალმხრივ რეჟიმში განსაზღვრავს ბანკი, რომელიც კლიენტის მიერ ამ მომსახურებით სარგებლობის საკითხს იხილავს და წყვეტს კლიენტის განცხადების საფუძველზე.
- 14.2. საგადახდო ინსტრუმენტებით მომსახურების მიღებასთან დაკავშირებით კლიენტის განაცხადის დაკმაყოფილების შემთხვევაში ბანკსა და კლიენტს შორის სახელშეკრულებო ურთიერთობა წინამდებარე გენერალურ ხელშეკრულებასთან ერთად რეგულირდება შესაბამისი დაკავშირებული გარიგებ(ებ)ით გათვალისწინებული პირობებით, რომელიც კლიენტისათვის ხელმისაწვდომია ბანკის ვებ-გვერდისა და ინტერნეტ-ბანკის სისტემის (ამ მომსახურებით სარგებლობის შემთხვევაში) მეშვეობით.
- 14.3. საგადახდო ინსტრუმენტის მოქმედების ვადა, მის შესაბამის საბარათე ანგარიშზე არსებულ ნაშთზე დასარიცხი წლიური საპროცენტო სარგებელი და მომსახურების პირობები განისაზღვრება ბანკის გენერალური დირექტორის მიერ დამტკიცებული და მოქმედი სტანდარტული მომსახურების პირობებით, რომელიც განთავსებულია ბანკის ვებ-გვერდზე: <https://halykbank.ge/ka/individuals/agreements>.
- 14.4. საპროცენტო სარგებლის (ასეთის არსებობის შემთხვევაში) გაანგარიშება წარმოებს ანგარიშზე თანხის მიღების მომდევნო დღიდან, ხელშეკრულების მოქმედების დასრულების დღის ჩათვლით. საპროცენტო სარგებლის გაანგარიშებისას მხედველობაში მიიღება კალენდარული დღეების ზუსტი რაოდენობა, ამასთან, წელიწადი იანგარიშება 365 დღით. საბარათე ანგარიშზე არსებულ ნაშთზე დარიცხული საპროცენტო სარგებლის გადახდა წარმოებს შესაბამის ვალუტაში, ხელშეკრულების ძალაში შესვლიდან ყოველი თვის დასრულების შემდეგ, შესაბამის საბარათე ანგარიშზე ჩარიცხვის გზით.
- 14.5. ბანკს უფლება აქვს შეცვალოს საპროცენტო სარგებლის განაკვეთი ცალმხრივად საპროცენტო სარგებლის განაკვეთის ცვლილების თაობაზე ბანკის გადაწყვეტილების ძალაში შესვლის დღიდან. ასეთ შემთხვევაში ბანკი ვალდებულია გადაწყვეტილების ძალაში შესვლამდე ოცდაათი დღით ადრე გაუგზავნოს კლიენტს წერილობითი ან ელექტრონული შეტყობინება საბარათე ანგარიშზე არსებულ ნაშთზე საპროცენტო სარგებლის განაკვეთის ცვლილების შესახებ. წინასწარი შეტყობინების ვალდებულება არ ვრცელდება იმ შემთხვევაზე, როდესაც საპროცენტო სარგებლის ცვლილება ხორციელდება კლიენტის სასარგებლოდ.
- 14.6. შემდგომში გაურკვევლობის თავიდან არიდების მიზნით, ინტერნეტ-ბანკის სისტემის მომსახურებით სარგებლობის შემთხვევაში საგადახდო ინსტრუმენტებით მომსახურება კლიენტს შეიძლება მიეწოდოს, ბანკისათვის ელექტრონულ ფორმაში განცხადების წარდგენისა და ამ განცხადების ბანკის მიერ ინტერნეტ-ბანკის სისტემით დაკმაყოფილების გზით, რა დროსაც ბანკსა და კლიენტს შორის სახელშეკრულებო ურთიერთობა ყალიბდება წინამდებარე გენერალური ხელშეკრულებითა და დაკავშირებული გარიგებ(ებ)ით გათვალისწინებული შესაბამისი პირობების მიხედვით.
- 14.7. შემდგომში გაურკვევლობის თავიდან არიდების მიზნით, საგადახდო ინსტრუმენტებით მომსახურების პროდუქტების, მისი სახეების, პირობებისა და ფორმების ბანკის მიერ განსაზღვრა არ გულისხმობს დაპირებასა და არ წარმოშობს ბანკის ვალდებულებას კლიენტისათვის საგადახდო ინსტრუმენტებით მომსახურების გაწევაზე.

თავი 7. საკრედიტო მომსახურება

მუხლი 15. საკრედიტო მომსახურება

- 15.1. კლიენტისათვის წინამდებარე გენერალური ხელშეკრულებით ხელმისაწვდომი და დასაშვები საკრედიტო მომსახურების პროდუქტებს, სახეებს, პირობებსა და ფორმებს დამოუკიდებლად და ცალმხრივ რეჟიმში განსაზღვრავს ბანკი, რომელიც კლიენტის მიერ ამ მომსახურებით სარგებლობის საკითხს იხილავს და წყვეტს კლიენტის განცხადების საფუძველზე.
- 15.2. საკრედიტო მომსახურების მიღებასთან დაკავშირებით კლიენტის განაცხადის დაკმაყოფილების შემთხვევაში ბანკსა და კლიენტს შორის სახელშეკრულებო ურთიერთობა წინამდებარე გენერალურ ხელშეკრულებასთან ერთად რეგულირდება შესაბამისი დაკავშირებული გარიგებ(ებ)ით გათვალისწინებული პირობებით, რომელიც კლიენტისათვის ხელმისაწვდომია ბანკის ვებ-გვერდისა და ინტერნეტ ბანკის სისტემის (ამ მომსახურებით სარგებლობის შემთხვევაში) მეშვეობით.
- 15.3. შემდგომში გაურკვევლობის თავიდან არიდების მიზნით, ინტერნეტ-ბანკის სისტემის

მომსახურებით სარგებლობის შემთხვევაში საკრედიტო მომსახურება კლიენტს შეიძლება მიეწოდოს, ბანკისათვის ელექტრონულ ფორმაში განცხადების წარდგენისა და ამ განცხადების ბანკის მიერ ინტერნეტ-ბანკის სისტემით დაკმაყოფილების გზით, რა დროსაც ბანკსა და კლიენტს შორის სახელშეკრულებო ურთიერთობა ყალიბდება წინამდებარე გენერალური ხელშეკრულებითა და დაკავშირებული გარიგებ(ებ)ით გათვალისწინებული შესაბამისი პირობების მიხედვით.

- 15.4. შემდგომში გაურკვევლობის თავიდან არიდების მიზნით, საკრედიტო მომსახურების პროდუქტების, მისი სახეების, პირობებისა და ფორმების ბანკის მიერ განსაზღვრა არ გულისხმობს დაპირებას და არ წარმოშობს ბანკის ვალდებულებას კლიენტისათვის საკრედიტო მომსახურების გაწევას.

თავი 8. ზოგადი დებულებები

მუხლი 16. ცვლილებები და დამატებები გენერალურ ხელშეკრულებასა და მასთან დაკავშირებულ გარიგებებში, ასევე ტარიფებსა და სხვა წესებში.

- 16.1. მხარეები საგანგებოდ თანხმდებიან, რომ ბანკი უფლებამოსილია ნებისმიერ დროს ცალმხრივ რეჟიმში შეიტანოს ცვლილება/დამატება წინამდებარე გენერალურ ხელშეკრულებაში, მის საფუძველზე ჩამოყალიბებულ სახელშეკრულებო პირობებში, დაკავშირებულ გარიგებებში, გამოქვეყნებულ ტარიფებში, წესებში და სხვა პირობებში, რომლის თაობაზე კლიენტს ეცნობება ბანკის ვებ-გვერდზე გამოქვეყნების გზით და/ან ბანკში დაფიქსირებულ კლიენტის რომელიმე ერთ-ერთი საკომუნიკაციო საშუალების მეშვეობით.
- 16.2. ცვლილებები, რომელიც არსებითად ცვლის ბანკსა და კლიენტს შორის ჩამოყალიბებულ სახელშეკრულებო ნებისმიერ პირობას, რომლის ცალმხრივად და კლიენტისაგან დამატებითი თანხმობის გარეშე შეცვლის უფლება ბანკს არ გააჩნია, ძალაში შედის და კლიენტისათვის შესასრულებლად სავალდებულო ხდება ამ ცვლილებების თაობაზე კლიენტისათვის შესაბამისი შეტყობინებიდან (გამოქვეყნებიდან) 30 კალენდარული დღის გასვლის შემდგომ, გარდა იმ შემთხვევისა, თუ ამ ვადის განმავლობაში კლიენტი წერილობით უარს არ განაცხადებს აღნიშნულ ცვლილებაზე (ამ უკანასკნელ შემთხვევაში ბანკს წარმოეშვება უფლება შეწყვიტოს კლიენტთან შესაბამისი ის სახელშეკრულებო ურთიერთობა, რომელშიც ცვლილებების ინიცირებას კლიენტმა არ დაუჭირა მხარე).

მუხლი 17. პერსონალური მონაცემების მოპოვება / დამუშავება

- 17.1. მხარეები თანხმდებიან, რომ ბანკი უფლებამოსილია კანონმდებლობით დადგენილ ფარგლებში მუდმივად აწარმოოს კლიენტის პერსონალური მონაცემების დამუშავება, მათი მოპოვება და შენახვა ნებისმიერი წყაროდან, მათ შორის სახელმწიფო და არასახელმწიფო, კერძო დაწესებულებიდან.
- 17.2. წინამდებარე გენერალური ხელშეკრულების დადებით კლიენტი ადასტურებს, რომ ინფორმირებულია მასზე, რომ:
- 17.2.1. „პერსონალურ მონაცემთა დაცვის შესახებ“ საქართველოს კანონით გათვალისწინებული პრონციპებისა და სამართლებრივი საფუძვლის არსებობის შემთხვევაში, ბანკი უფლებამოსილია დაამუშაოს/მოიპოვოს კლიენტის პერსონალური მონაცემები, რომელიც კონკრეტული, კანონიერი მიზნის მიღწევის პროპორციულ და აუცილებელ საშუალებას წარმოადგენს. მათ შორის, კლიენტის იდენტიფიკაცია და ვერიფიკაცია მოახდინოს სსიპ „სახელმწიფო სერვისების განვითარების სააგენტოს“ მონაცემთა ბაზის საშუალებით.
- 17.2.2. ამასთან, საქართველოს ეროვნული ბანკის მიერ დადგენილი წესების შესაბამისად, კლიენტის თანხმობის საფუძველზე, როგორც მომავალი მსესხებლის/თანამსესხებლის/თავდების/უზრუნველყოფის საშუალების მიმწოდებლის გადახდისუნარიანობის ანალიზის მიზნით, საკრედიტო ბიუროს - სს „კრედიტინფო საქართველოს“, აგრეთვე, სათანადოდ შექმნილი და საქართველოს კანონმდებლობის შესაბამისად მოქმედი სხვა საკრედიტო ბიუროს / საფინანსო დაწესებულების მონაცემთა ელექტრონული ბაზიდან/მონაცემთა ბაზიდან ბანკი მოიპოვებს კლიენტის შესახებ დაცულ პერსონალურ და კომერციულ მონაცემებს, ბანკის მიერ საბანკო მომსახურების გაწევის მიზნის პროპორციული მოცულობით და კლიენტის თანხმობის შემთხვევაში, შეთავაზების განხორციელების მიზნით.
- 17.3. წინამდებარე გენერალური ხელშეკრულების 17.2. პუნქტში მონაცემთა დამუშავების შესახებ წერილობით გამოხატულ თანხმობას გააჩნია წერილობითი ფორმით შესრულებული, ქაღალდზე დაბეჭდილი, კლიენტის მიერ ხელმოწერით დადასტურებული საბუთის ტოლფასი იურიდიული ძალა.
- 17.4 კონფიდენციალურობის შეტყობინება განთავსებულია ბანკის ოფიციალურ ვებ-გვერდზე:

მუხლი 18. მოქმედების ვადა

- 18.1. წინამდებარე გენერალური ხელშეკრულება მოქმედებს კლიენტის მიერ მისი წერილობითი/ელექტრონული ფორმით აღიარება/დადასტურების მომენტიდან და მოქმედებს განუსაზღვრელი ვადით.

მუხლი 19. დავების განხილვის წესი და გამოსაყენებელი სამართალი

- 19.1. მხარეები თანხმდებიან, რომ წინამდებარე ხელშეკრულებიდან გამომდინარე წარმოშობილ დავას განიხილავს და გადაწყვეტს თბილისის საქალაქო სასამართლოს სამოქალაქო საქმეთა კოლეგია, საქართველოს კანონმდებლობის შესაბამისად.
- 19.2. წინამდებარე შეთანხმების მიმართ მოქმედებს საქართველოს კანონმდებლობა, რა დროსაც დაუშვებელია უცხო ქვეყნის სამართლის გამოყენება.

მუხლი 20. დასკვნითი დებულებები

- 20.1. წინამდებარე გენერალური ხელშეკრულების რომელიმე დებულების ბათილობა არ იწვევს ამავე ხელშეკრულების სხვა დებულებებისა და მის სრულ ბათილობას, თუ ბათილი დებულების მიუხედავად შესაძლებელია შეთანხმებული საგნის მიღწევა.
- 20.2. მხარეები თანხმდებიან, კლიენტი უფლებამოსილებას ანიჭებს ბანკს ქალაქის/მოზილური ტელეფონის ნომერ(ებ)ზე ან/და ელექტრონული ფოსტის მისამართ(ებ)ზე ან/და საფოსტო მისამართ(ებ)ზე ან/და ინტერნეტ-ბანკის სისტემით გამოაგზავნოს საბანკო პროდუქტის ან/და მომსახურების შესახებ შეთავაზება ან/და ნებისმიერი სახის საინფორმაციო/გამაფრთხილებელი შეტყობინება (ფოსტის, ელექტრონული ფოსტის, ინტერნეტ-ბანკის სისტემის, სატელეფონო ზარების, SMS შეტყობინების ან/და სხვა კომუნიკაციების საშუალებით).
- 20.3. მხარეები გარანტიას იძლევიან, რომ წინამდებარე ხელშეკრულების დადება არ ეწინააღმდეგება საქართველოს კანონმდებლობასა და მესამე პირებთან დადებულ გარიგებას, რომ ადგილი არ აქვს მოჩვენებითობასა და/ან სხვა გარიგების დამალვას და რომ არ არსებობს რაიმე ფაქტობრივი ან სამართლებრივი დაბრკოლება, რამაც შეიძლება შეაფერხოს და/ან შეუძლებელი გახადოს წინამდებარე ხელშეკრულების განხორციელება.
- 20.4. მხარეები საგანგებოდ აღნიშნავენ, რომ წინამდებარე ხელშეკრულება დადებულია მხარეთა ნების თავისუფალი გამოვლენითა და მასზე მართლსაწინააღმდეგო ზემოქმედების გარეშე, რომელიმე მხარის მხრიდან სხვაგვარი შედეგების დაპირების გარეშე და ნებათა თანხვედრით.
- 20.5. ამ ხელშეკრულების მოქმედების განმავლობაში თითოეულმა მხარემ უნდა შეატყობინოს მეორე მხარეს საკონტაქტო რეკვიზიტების ცვლილების შესახებ. აღნიშნულის შეუსრულებლობის შემთხვევაში ძველ მისამართზე გაგზავნილი შეტყობინება განიხილება მიღებულად, რომელსაც სდევს შესაბამისი სამართლებრივი შედეგები.
- 20.6. ამ ხელშეკრულებით კლიენტი აცხადებს თანხმობას, რომ მასთან განხორციელებული ნებისმიერი სატელეფონო საუბარი (მათ შორის მისი ნებისმიერი მოთხოვნა/განცხადება საბანკო ინფორმაციის მიღების, სერვისით სარგებლობისთვის რეგისტრაციის, რეგისტრირებულ მონაცემებში ცვლილებების შეტანის, საბანკო (მათ შორის საკრედიტო) პროდუქტის მიღების ან/და ოპერაციის განხორციელების შესახებ) დაფიქსირდეს ბანკის მონაცემთა ელექტრონულ ბაზაში და დავის შემთხვევაში ასეთ ჩანაწერს ჰქონდეს მტკიცებულებითი ძალა (გამოყენებული იქნეს მტკიცებულებად).
- 20.7. წინამდებარე ხელშეკრულების დადებით ძალადაკარგულად ცხადდება იმავე საგანზე მხარეებს შორის ადრე წარმოებული ნებისმიერი მოლაპარაკება და მიღწეული/დადებული ყველა შეთანხმება, რაც არ იწვევს წარმოშობილი და შეუსრულებელი ვალდებულებების ანულირება/გაქარწყლებას.
- 20.8. კლიენტი უფლებამოსილია წარადგინოს წინამდებარე ხელშეკრულებით გაწეულ მომსახურებაზე პრეტენზიები ბანკის ნებისმიერ ფილიალში/სერვის-ცენტრში ან ბანკის (სათაო ოფისის) კანცელარიაში ზეპირი ან სტანდარტული წერილობითი ფორმით, აგრეთვე ინტერნეტ-ბანკის სისტემიდან შეტყობინებების გამოგზავნით (ამ მომსახურებით სარგებლობის შემთხვევაში), წარდგენილი პრეტენზიის განხილვისა და წერილობითი პასუხის გაცემის მაქსიმალური ვადა შეადგენს 30 (ოცდაათი) დღეს. პრეტენზიების განხილვის პროცედურის შესახებ ინფორმაცია

განთავსებულია ბანკის ოფიციალურ ვებ გვერდზე www.halykbank.ge.